

15 projek atasi banjir kilat di ibu negara

KUALA LUMPUR 19 Nov.- Dewan Bandaraya Kuala Lumpur (DBKL) akan membelanjakan sebanyak RM96.5 juta bagi melaksanakan 15 projek dalam usaha mengatasi banjir kilat di ibu kota pada tahun depan.

Pengarah Eksekutif Pelaksanaan Projek dan Penyelenggaraan DBKL, Datuk Ir. Tan Keng Chok berkata, antara projek tersebut termasuklah membina tiga kolam takungan banjir yang akan meningkatkan kapasiti longkang bagi mengelak banjir kilat daripada berlaku.

Ujarnya, kolam itu akan dibina di Taman SPK Segambut, Jalan Duta dan Jalan Kuching.

Katanya, projek-projek lain pula termasuk menaik taraf longkang sedia ada di kawasan yang berisiko berdepan banjir teruk.

“Projek naik taraf ini memba-bitkan pembinaan longkang yang lebih besar bagi menampung kapasiti air sekiranya berlaku hujan lebat terutamanya di beberapa kawasan tumpuan antaranya di pekan Kepong, Jalan Awan Besar

di Taman OUG dan Kampung Batu Muda Tambahan.

“Semua projek itu akan dilaksanakan bermula Januari tahun depan dan dijangka siap sepenuhnya pada penghujung tahun 2016,” katanya di sini hari ini.

Beliau diminta mengulas berhubung pembentangan Bajet DBKL 2016 oleh Datuk Bandar Kuala Lumpur, Datuk Mhd. Amin Nordin Abd. Aziz yang membabitkan peruntukan sebanyak RM2.27 bilion.

Daripada jumlah itu, sebanyak RM670 juta diperuntukkan untuk pembaikan jalan raya dan saliran di sekitar ibu negara.

Mengulas lanjut, beliau berkata, sebanyak empat projek menaik taraf kapasiti longkang daripada 12 projek pada tahun ini telah siap sepenuhnya.

“Bagaimanapun lapan projek yang lain masih dalam proses pelaksanaan dan dijangka siap awal tahun depan.

“Empat projek tersebut adalah di Jalan Chan Sow Lin, Jalan Sun-

gai Besi, Perumahan DBKL Gombak dan Jalan Intan Baiduri di Kepong.

“DBKL berharap projek itu dapat mengatasi masalah banjir kilat yang kerap berlaku di kawasan tersebut sehingga menyusahkan orang ramai,” jelasnya.



Semua projek itu akan dilaksanakan bermula Januari tahun depan dan dijangka siap sepenuhnya pada penghujung tahun 2016,”

IR. TAN KENG CHOK

Pengarah Eksekutif Pelaksanaan Projek dan Penyelenggaraan DBKL